

homines cognoverit, nemo mirabitur. De re metrica, quatenus ea, propter arctissimum cum rationibus criticis vinculum, huc pertinet, Lassenius disputabit, et diversa versuum genera, quotquot in toto Hitôpadêsa inveniuntur, in conspectu simul collocata nominibus suis numerisque signabit, ut lectorem de singulis inquirentem eo deinde remittat.

Librum in sermonem Latinum vertendi munus ego in me suscepi, quae commentarii perpetui species est brevitati maxime accommodata. Porro geographica, mythologica, physica, philosophica, leges, religiones, consuetudines Indorum proprias, nec vulgo notas, omnia denique, quorum obscuritas non in verbis, sed in rebus ipsis sita est, scholiis adiectis illustrabo. Quibus ad finem perductis speramus nihil desideratum iri, quod aut viris doctis ad legendum cum voluptate librum elegantissimum commodum esse possit, aut ad intelligendum tironibus necessarium.

*Scribebam Bonnae Mense Iulio 1829.*

---